



# Šest uhapšenih zbog ratnog zločina

Postupajući po nalogu tužitelja iz Posebnog odjela za ratne zločine Tužiteljstva BiH, timovi specijalne jedinice **SIPA**, na području Vlasenice, Milića i okolne, locirali su i priveli pet osoba osumnjičenih za ratni zločin.

Kako je saopćeno iz Tužilaštva BiH, privedeni su Branko Jolović Branko (1957), Milomir Milošević (1961), Nenad Vukotić (1963), Nikola Lošić (1965) i Dejan Milanović (1946).

- Šesti osumnjičeni Radomir Pantić uhapšen je nakon ročišta u Sudu BiH, gdje mu se sudi za drugo krivično djelo ratnog zločina, istakli su iz državnog Tužilaštva te pojasnili da su šestorica privedenih pod istragom zbog sumnje da su, u svojstvu pripadnika policijskih i vojnih struktura VRS-a, u proljeće 1992. počinili ratni zločin nad žrtvama bošnjačke nacionalnosti na području mjesta Zaklopača, opština Milići.

Zločin je počinjen 16. maja 1992. godine, kada je prilikom organiziranog vojnog i policijskog

napada na mjesto Zaklopača, u njihovima domovima, dvorištima i okolnim objektima, ubijeno više od 60 civila bošnjačke nacionalnosti, među kojima je bilo i žena, staraca te i djece, a koji su ostavljeni mrtvi na mjestima ubistva. Dan kasnije tijela su uklonjena i ukopana u masovne grobnice. Najveći broj posmrtnih ostataka otkriven je u masovnoj grobnici 2004, a do danas su otkriveni i ekshumirani posmrtni ostaci 54 osobe, dok se za ostalim još traga.

Tužiteljstvo BiH zajedno sa partnerskim policijskim i sigurnosnim agencijama, provelo je dugu i temeljitu istragu radi rasvjetljavanja ovog zločina, tijekom koje su prikupljeni dokazi da su navedeni osumnjičeni sudjelovali u počinjenju ovog zločina.

Navedeni osumnjičeni, koji su pod istragom zbog zločina protiv čovječnosti, bit će predati postupajućem tužitelju, koji će ih ispitati, te nakon toga odlučiti o daljnjim aktivnostima.